

Dragi prijatelji/ce,



Predstavljamo vam **novembarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **180** organizacija i **113** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

**Uživajte u čitanju!!**

## SADRŽAJ

<b>Aktivnosti u novembru 2015.</b>	.....	<b>2</b>
<b>Planovi za decembar 2015.</b>	.....	<b>5</b>
<b>Aktivnosti članova mreže</b>	.....	<b>6</b>
<b>Nova članica mreže</b>	.....	<b>16</b>
<b>Saopštenja / donatori / pozivi</b>	.....	<b>17</b>

## AKTIVNOSTI ORC / HCA U NOVEMBRU 2015.

### PREKOGRANIČNA GRAĐANSKA MREŽA ZA MIR, POMIRENJE I SIGURNOST LJUDI NA BALKANU



U sklopu projektnih aktivnosti u ovom regionalnom partnerskom projektu, ORC Tuzla i naši istraživači iz PRONI Brčko pripremaju izdavanje i distribuciju istraživanja „Aspekt ljudske sigurnosti mladih koji žive u kolektivnim centrima, ili „alternativnim smještajima“ u BiH. Isto tako, na osnovu rezultata istraživanja, tokom decembra održaćemo i sastanak stakeholdera, na koji ćemo pozvati predstavnike relevantnih ministarstava iz FBiH, RS i Brčko Distrikta Bosne i Hercegovine, te predstavnike opštinskih/općinskih odjeljenja i predstavnike institucija koje se bave pitanjima raseljenih lica i izbjeglica.

Projekat „*Prekogranične građanske mreže za mir, pomirenje i sigurnost ljudi na Balkanu*“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Kosovo, Omladinski resursni centar Tuzla. Projekat je podržan od Evropske Unije.

### OMLADINSKA GRUPA ORC TUZLA:

#### ► “MOĆ NEFORMALNE EDUKACIJE“



Trening pod nazivom „The Power of Nonformal Education“ održan je u Banja Luci od 15. do 20. novembra. Na treningu je učestvovalo 27 učesnika iz 9 evropskih zemalja (Albanija, Kosovo, Bosna i Hercegovina, Belgija, Crna Gora, Srbija, Portugal, Italija, Francuska).

Tema treninga je bila, kako i sam naziv kaže: Uticaj, uloga, značaj, mogućnosti i domet neformalnog obrazovanja, ali sa jednom "skrivenom" pozadinom i agendom rada na sesijama - a to je politički značaj. Seminar je organizovan u saradnji sa nekoliko različitih Ministarstava obrazovanja, mladih i sporta, te Ministarstva porodice, mladih i sporta RS, a jedan od predavača bio je i zamjenik Belgijskog ministra obrazovanja.

Predstavnik Omladinske grupe ORC Tuzla bio je Suad Murselović.

#### ► TRENING ZA STUDENTE O IZGRADNJI MIRA

Od 5. do 11. novembra na Bjelašnici je održan trening izgradnje mira za studente/ice iz Bosne i Hercegovine. Treningu je prisustvovalo 18 mladih ljudi iz čitave Bosne i Hercegovine.

Trening je održan u organizaciji Centra za nenasilnu akciju (CNA).

Tokom treninga sa učesnicima je radilo 5 trenera iz Srbije, Makedonije i Bosne i Hercegovine. Mladi su obrađivali teme suočavanja sa prošlošću, metode nenasilne komunikacije, razgovora sa ratnim veteranima.



Predstavnici ORC Tuzla na ovom treningu bili su Merita Sokoli i Slobodan Blagovčanin.

### ► “INTERNACIONALNI KONGRES STUDENATA I MLADIH DOKTORA MEDICON 2015“

Internacionalni kongres studenata i mladih doktora (bio)medicinske medicine "MediCon 2015." održan je od 30.10. - 1.11.2015. godine, na Medicinskom fakultetu Univerziteta u Tuzli.

Organizator kongresa je Udruženje studenata Medicinskog fakulteta „MEDICUS“, u saradnji sa Medicinskim fakultetom i Univerzitetom u Tuzli. Ovaj kongres se organizuje po prvi put na Medicinskom fakultetu Tuzla, nakon skoro dvije decenije od zadnje organizovanog kongresa ovakvog tipa.



Projekat "MediCon 2015." pokrenut je sa ciljem da studentima i mladim doktorima pruži priliku da se okušaju u pisanju i prezentaciji naučnih i naučno-istraživačkih radova. Kongres je okupio studente medicine iz 17 zemalja Evrope, Azije i Afrike, sa preko 250 registrovanih učesnika.

Jedan od članova organizacionog odbora, Adnan Mujanović, je ujedno i član naše grupe učestvovao je na kongresu.

### ► ERSTE SEMINAR



Erste Fondacija nas je pozvala da uzmemo učešće na seminaru o provedbi projekata finansiranih iz EU fondova, koji se održao u Zagrebu od 22. do 24. novembra. Učesnici seminara bili su iz: Srbije, Hrvatske, Slovenije i Bosne i Hercegovine. Predstavnici ORC Tuzla na seminaru bili su: Merita Sokoli i Muharem Gaši.

Cilj seminara bio je prije svega upoznavanje učesnika, te kako provesti aktivnosti unutar projekata apliciranih prema EU, kao i kako

zadovoljiti standarde evaluacije komisije iz EU koja nadgleda realizaciju cijelog projekta.

### ► PLANIRANE AKTIVNOSTI OGORC-A ZA MJESEC DECEMBAR

- Organizovanje „Movie night“ u prostorijama ORC Tuzla za članove omladinske grupe;
- Organizovanje (već tradicionalnog) Novogodišnjeg partija za članove Omladinske grupe ORC, simpatizere, saradnike, medije i donatore;
- Rekonstrukcija Projektnog tima OGORC-a:
- Organizovanje konferencije za javnost, na kojoj ćemo građane našeg grada, a i šire upoznati sa našim dostignućima i aktivnostima tokom ove godine, te sa planovima za narednu, 2016. godinu;
- Promocija i distribucija „Lične karte“ Omladinske grupe Omladinskog resursnog centra Tuzla.

## PREDSTAVLJAMO MLADE!

Od ovog izdanja Mjesečnog biltena Omladinske mreže u BiH i Omladinskog resursnog centra Tuzla, počinjemo predstavljati mlade aktiviste i volontere iz BiH.

Za ovaj mjesec odlučili smo se da predstavimo dvije mlade članice Omladinske grupe Omladinskog resursnog centra Tuzla:



### **DŽENITA TOSUNBEGOVIĆ**

je Učenica JUMS Građevinsko-geodetske škole Tuzla. Ima 17 godina. Član je Omladinske grupe Omladinskog Resursnog Centra Tuzla skoro godinu dana. Osim OGORC-a nema iskustva sa NGO sektorom. Organizacija joj je za kratko vrijeme pružila dosta znanja, iskustva, druženja i novih prijatelja.

Dženita slobodno vrijeme voli da provodi sa ostalim članovima OGORC-a, voli se baviti omladinskim aktivizmom.



### **JASMINA BEGOVIĆ**

rođena je u Tuzli, gdje je završila osnovnu i srednju školu. Trenutno studira na Prirodno-matematičkom fakultetu u Tuzli, odsjek primijenjene matematike. Član je Omladinske grupe ORC-a od ove godine, te aktivno učestvuje u projektima grupe. Neki od projekata u kojima je Jasmina učestvovala su: „Date the state“, „Youth Event 2015“, „Živi zdrav život Vol 2.“.

U slobodno vrijeme bavi se aerobikom, jogom i šivenjem. Voli čitati, gledati filmove, slušati modernu klasičnu muziku i učiti nove jezike. Njen životni moto je „Be you. The world will adjust.“

## REDOVNE AKTIVNOSTI ORC I HCA TUZLA:

Tokom novembra smo u sklopu naših redovnih aktivnosti radili na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti), održavali i redovno dopunjavali informacije na našoj web stranici [www.omladina-bih.net](http://www.omladina-bih.net), slali informacije koje smo dobili od omladinskih organizacija i pojedinaца iz mreže prema vani (međunarodnim organizacijama, organizacijama u regionu, donatorima), vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije

vezane za aktivizam mladih u BiH. Isto tako, naš projektni tim je aplicirao za projekte za narednu godinu.

Krajem mjeseca smo izvršili osvježavanje stranice [www.omladina-bih.net](http://www.omladina-bih.net), te njeno prebacivanje na novi server. Naš novi provajder je firma GENESIS iz Cazina.

## PLANOVI HCA/ORC-A ZA DECEMBAR 2015.

- Sprovođenje redovnih aktivnosti kroz Omladinsku mrežu BiH.
- Nastavak aktivnosti u okviru Prekogranične građanske mreže za mir, pomirenje i sigurnost ljudi na Balkanu (nastavak rada na istraživanju – organizovanje sastanka sa stakeholderima).
- Održavanje (već) tradicionalne „Novogodišnje zabave“ za članove Omladinske grupe Omladinskog resursnog centra Tuzla.
- Koordinacija ALF mreže BiH, nastavak i razvoj saradnje sa Sekretarijatom u Aleksandriji i ostalim ALF nacionalnim mrežama;
- Podrška radu Omladinske grupe ORC-a.

Više informacija na: [posta@omladina-bih.net](mailto:posta@omladina-bih.net)

**DRAGE/I ČITATELJKE I ČITATELJI NAŠEG MJESEČNOG BILTENA,**

*Bliži nam se jubilarno – 200. Izdanje Mjesečnog biltena Omladinske mreže u BiH. Skoro smo 17 godina – još od davne 1999. godine, sa vama. Redovno smo objavljivali informacije o aktivnostima mladih u Bosni i Hercegovini, prezentovali omladinske organizacije i pojedince, slali vam informacije o mogućim partnerima, donatorima, aktivnostima. Bilten svaki mjesec šaljemo na preko 5.000 e-mail adresa u BiH, regiji i svijetu. Postavljamo ga na mejling liste, web stranice, FB grupe i profile. Vaši priloz, komentari, pohvale (ali i kritike) su nam samo jedan od dokaza da trebamo nastaviti (volonterski, naravno) raditi na njemu. Koristimo se prilikom da se svima vama zahvalimo na redovnom javljanju, čitanju, komentarima, dijeljenjima, pozivima...*

*Želimo isto tako i da se zahvalimo sljedećim omladinskim organizacijama – članicama Omladinske Mreže u BiH, kao i pojedincima koji su nam tokom ove – 2015. Godine - redovno slali informacije o svojim aktivnostima i planovima, bez kojih i ne bismo mogli izdavati ovaj bilten. Ne zamjerite ako nekoga slučajno izostavimo: **KULT** Institut za omladinski razvoj Sarajevo, Omladinska organizacija **SVITAC** Brčko distrikt, **Ernada Avdibegović**- pojedinac Kladanj, Asocijacija srednjoškolaca – **ASUBiH** Sarajevo, Centar za omladinski razvoj **PRONI** Brčko, H.O. **Merhamet** Dobo, H.O. **Čisto srce** Prijedor, **INPUT** Zenica, **Vijeće mladih** općine Tomislavgrad, **Omladinski centar** Jajce, H.O. **PARTNER** Banja Luka, **GENDER** Brčko, NGO „**Eko-Leonardo**“ Priboj, UG Tolerancijom protiv različitosti – **ToPeeR** Dobo, **LJUBICA MLADENović** – referent za mlade Gradske uprave Bijeljina, **Nova ženska inicijativa** Tuzla, UG **KRIVA RIJEKA** Olovo, Omladinsko udruženje **NOVA VIZIJA** Travnik, Centar za djecu i omladinu **FORTIS** Jablanica, Omladinski klub **DIJAMANT** Jajce, **Mostarski teatar mladih**... Hvala vam svima!*



## AKTIVNOSTI ČLANICA OMLADINSKE MREŽE BIH



### ASOCIJACIJA SREDNJOŠKOLACA U BOSNI I HERCEGOVINI

Adresa: Mula Mustafe Bašeskije br. 7, 71 000 Sarajevo

Tel/fax: 033 205 850

e-mail: [asubih@yahoo.com](mailto:asubih@yahoo.com)

web: [www.asubih.ba](http://www.asubih.ba)

### ► "17. NOVEMBAR – MEĐUNARODNI DAN SREDNJOŠKOLACA – USUDI SE, (PRI)DRUŽI SE!



Asocijacija srednjoškolaca u Bosni i Hercegovini (ASuBiH) je nevladina, nestranačka i nepolitička organizacija, čiji je osnovni cilj poboljšanje statusa srednjoškolaca u zemlji. ASuBiH okuplja sve mlade koji pohađaju srednju školu na prostoru BiH.

U Bosni i Hercegovini, kao i u zemljama širom svijeta, 17. novembar se obilježava kao Međunarodni dan srednjoškolaca. ASuBiH ovaj dan obilježava od 2009. godine u spomen na praške srednjoškolce, koji su zbog mirnog protesta protiv nacističke okupacije svoje zemlje,

1939. godine strijeljani bez suđenja.

Ove godine ASuBiH je obilježio 17. Novembar u 55 lokalnih zajednica, u kojima su glavni akteri bili srednjoškolci. Glavna aktivnost je bila diskusija o problemima koji su prisutni na lokalnom nivou, a utiču na položaj srednjoškolaca.

Cilj glavne aktivnosti je identifikacija problema koji su prisutni u našim srednjim školama, te prijedlog mogućih rješenja istih.

Pored glavne aktivnosti realizovan je i niz sporednih aktivnosti u koje spadaju defile, freeze performans i ASuBiH photo (problem) corner. Učestvovalo je između 700 i 1000 srednjoškolaca.



Sve aktivnosti su medijski propačene kako na lokalnom, tako i na državnom nivou.

Projekat je podržan od strane fondacije **Schüler Helfen Leben**.



## VIJEĆE MLADIH OPĆINE TOMISLAVGRAD

Letka b.b., 80 240 Tomislavgrad

Tel.: 034 356 440, fax: 034 356 444

E-mail: [vijecemladih.tg@gmail.com](mailto:vijecemladih.tg@gmail.com)

U organizaciji Vijeća mladih općine Tomislavgrad, a u cilju zajedničkog preventivnog djelovanja u sprječavanju različitih oblika asocijalnih ponašanja kod učenika srednjoškolske dobi, u petak, 20. studenog u zgradi Općine Tomislavgrad održan je radni sastanak djelatnika Policijske postaje Tomislavgrad, Srednje strukovne škole Tomislavgrad, Gimnazije Marka Marulića, Centra za socijalnu skrb Tomislavgrad, Doma zdravlja i Općine Tomislavgrad.



Sastanku su nazočili pomoćnik za promet načelnika policijske postaje i voditeljica sektora PP, pedagogice iz Srednje strukovne škole i Gimnazije Marka Marulića, ravnatelj Centra za socijalnu skrb Tomislavgrad, psihologinja u Domu zdravlja Tomislavgrad, predstavnici Općine Tomislavgrad, kao i predstavnici vijeća učenika iz obje naše srednje škole.

Tom prilikom dogovorena je zajednička suradnja i protok informacija u preventivnom sprječavanju neprihvatljivih ponašanja učenika, poglavito onih koja uključuju fizičko i psihičko nasilje među djecom, uništavanje školskog inventara, izostajanje s nastave i konzumiranje opojnih sredstava, prije svega alkohola. Poseban naglasak je stavljen na potrebu zajedničke suradnje u cilju pomoći djeci koja dolaze iz problematičnih obitelji, u kojima je nasilje usvojeno kao obrazac ponašanja, budući da se upravo kod takve djece često uočavaju poremećaji u ponašanju.

Predstavnici navedenih institucija će i dalje redovito pratiti navedenu problematiku i s tim u vezi održavati radne sastanke, te na taj način doprinosti prevenciji neprihvatljivih ponašanja i podizanju razine sigurnosti među mladima na području općine Tomislavgrad.

Velik dio problema proističe iz nepoštivanja radnog vremena ugostiteljskih objekata i točenja alkohola maloljetnicima, čak i u vrijeme trajanja nastave. Problem predstavljaju i roditelji koji negiraju i ne sagledavaju probleme koje imaju njihova djeca (nekritičnost roditelja). Predstavnici vijeća učenika su se složili sa zaključcima sastanka i sa detektiranim problemima.



www.pronibrcko.ba

**PRONI Centar za omladinski razvoj**  
Mehmedagića 24, 76 100 Brčko distrikt BiH  
Tel./Fax: 00 387 49 217 695  
E-mail: [pronibrcko@teol.net](mailto:pronibrcko@teol.net)  
[www.pronibrcko.ba](http://www.pronibrcko.ba)

► **“ART CROSSING BORDERS“ – UMJETNOST! NE GRANICE!**



Članovi PRONI Brčko su u novembru ugostili mlade umjetnike iz Subotice i Novog Sada koji su, zajedno sa lokalnom ekipom, uradili nekoliko vrhunskih grafita i na taj način poslali poruku mira i saradnje. Aktivnost je realizovana u okviru projekta "Art crossing borders - Umjetnost! Ne granice!" koji zajednički implementiraju PRONI (BIH) i Cosmo (Srbija), a podržan je od strane SHL fondacije. Hvala svima koji su uzeli učešće i svima koji su podržali projekat a posebno hvala Deji koji je i najzaslužniji za projekat.

► **POTPISIVANJE SPORAZUMA O SARADNJI I PARTNERSKOM DJELOVANJU IZMEĐU UDRUŽENJA GRAĐANA ZA PROMOCIJU OBRAZOVANJA ROMA „OTAHARIN“ I „PRONI“ CENTRA ZA OMLADINSKI RAZVOJ**



U petak, 06.11.2015. u prostorijama Centra za kulturu Bijeljina održana je konferencija za medije sa ciljem zvaničnog predstavljanja javnosti novog vida saradnje između ova dva udruženja.

Potpisivanju Sporazuma su prisustvovali izvršni direktor udruženja "Otaharin", Dragan Joković, generalni menadžer "PRONI" Centra i koordinator Lokalnog volonterskog servisa Bijeljina, Gorana Planinčić.

Sporazum je potpisan u svrhu zajedničkog djelovanja u oblasti promocije i razvoja volonterizma, iniciranja i usvajanja strategija, politika i pravila o volonterizmu na lokalnom nivou, podrške u radu Lokalnog volonterskog servisa Bijeljina, kao i Omladinskog info centra „Infoteka“, sprovođenja mjera kojima se prezentuje uloga i značaj voloniranja za razvoj lokalne zajednice.

„Lokalni volonterski servis (LVS) je struktura koja radi na razvoju i sprovođenju kvalitetnog organizovanog rada sa volonterima (volonterski menadžment), pa kroz taj sistem daje doprinos u rješavanju problema u lokalnoj zajednici i uspostavlja balans između ponude i potražnje za ljudskim resursima (volonterima).“



## INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: [kult@mladi.org](mailto:kult@mladi.org)

Tel.: 033 778 778; fax: 033 778 779

Web: [www.mladi.org](http://www.mladi.org)

### ► REFORMSKA AGENDA MORA UVJERITI MLADE DA NJIHOV ŽIVOT U BiH IMA PERSPEKTIVNU BUDUĆNOST.

Sredinom novembra u Washingtonu je održana konferencija „20 godina nakon Dejtona: Reformski put Bosne i Hercegovine“, koja je posvećena izgledima za reforme u BiH. Konferenciju je organizovao Centar za transatlantske odnose i Američko-bosanska fondacija povodom 20. godišnjice potpisivanja Dejtonskog sporazuma. Konferenciji je prisustvovao i Jasmin Bešić, izvršni direktor Instituta za razvoj mladih KULT.



Ekonomске i socijalne reforme u Bosni i Hercegovini su moguće samo ako u njima mladi ljudi zauzmu važnu ulogu kao nosioci potencijala za stvaranje novih vrijednosti, izjavio je u Washingtonu Jasmin Bešić, izvršni direktor Instituta za razvoj mladih KULT. Naglašava da mladi masovno napuštaju BiH, jer ne vide svoju budućnost u njoj, a bez zaposlenih mladih ljudi urušava se socijalni, zdravstveni, penzijski i svaki drugi sistem.

„Reformska agenda mora uvjeriti mlade da njihov život u BiH ima perspektivnu budućnost. Ali, to nije dovoljno. Politika se treba usredotočiti na rješenja koja donose brze rezultate. Usklađivanje obrazovnog sistema s potrebama na tržištu rada, stvaranje novih radnih mjesta u perspektivnim granama privrednog sektora, povećanje budžetskih poticaja za preduzetništvo mladih, uvođenje poreskih olakšica za zapošljavanje i preduzetništvo mladih samo su prvi koraci koji će pokrenuti ekonomske i socijalne reforme – kazao je Bešić.

Predstavnici Američko-bosanske fondacije ističu da je najveći značaj konferencije u tome što je ona okupila ključne donosiocice odluka na jednom mjestu i civilni sektor. "Započeti reformski procesi u Bosni i Hercegovini se trebaju nastaviti, jer je neophodno stvoriti bolji i kvalitetniji okvir koji će dati garancije za stabilnost, sigurnost i prosperitet naše zemlje, uvažavajući njenu punu suverenost i neovisnost, te teritorijalni integritet“ – istakao je Mirza Ustamujić, predsjednik Upravnog odbora Američko-bosanske fondacije.

### ► NASTAVAK SARADNJE MINISTARSTVA FINANSIJA FBiH I INSTITUTA ZA RAZVOJ MLADIH KULT

Tokom konferencije „20 godina nakon Dejtona: Reformski put Bosne i Hercegovine“, koja je posvećena izgledima za reforme u BiH, a koja je održana 16. i 17. novembra u Washingtonu D.C., Jasmin Bešić, izvršni direktor Instituta za razvoj mladih KULT, razgovarao je s gđom Jelkom Milićević, zamjenicom premijera i ministricom za finansije u Vladi FBiH.

Bešić je u razgovoru naglasio važnost reformskih procesa u oblasti zapošljavanja i samozapošljavanja mladih ljudi kako bi se smanjilo njihovo iseljavanje iz BiH, te naveo primjer inicijative Poslovni prostor BH kao uspješan model



saradnje svih interesnih strana.

Bešić je pozdravio i budžetske poticaje koje Vlada FBiH namjerava povećati, te istaknuo da je neophodno ulagati u perspektivne grane privrede i dobro isplanirane programe omladinskog preduzetništva. Ministrica Miličević je iskazala spremnost na saradnju s Institutom s namjerom da se partnerskim odnosom definiraju mjere koje su prilagođene potrebama i mogućnostima mladih ljudi.

### ► ODRŽANA MEĐUNARODNA KONFERENCIJA „ULOGA ORGANIZACIJA CIVILNOG DRUŠTVA U IZBORIMA 2014./2016.“

Institut za razvoj mladih KULT organizovao je u Sarajevu međunarodnu konferenciju o ulozi organizacija civilnog društva u izborima. Konferenciji su prisustvovali mladi iz Bosne i Hercegovine, Srbije, Makedonije i Kirgistana.



Organizacije civilnog društva odigrale su veliku ulogu u izborima koji su u Bosni i Hercegovini održani 2014. godine. Institut za razvoj mladih KULT, koalicija „Pod lupom“, te Transparency International BiH, govorili su o konkretnim aktivnostima koje su poduzeli, a koji su doprinijeli uključivanju građana, posebno mladih u izborni proces. „U Bosni i Hercegovini živi oko 600 000 mladih ljudi i oni čine oko 20% ukupnog biračkog tijela. Mladi bi trebali biti jako važna ciljna grupa političkih partija koje se takmiče na izborima u Bosni i Hercegovini. Podaci koje smo dobili od Centralne izborne

komisije govore da oko 50% njih zaista glasa. Zato smo protekle tri godine radili na tome da educiramo mlade kako i za koga glasati. Pokrenuli smo inicijativu „M1 Prava za mlade“ koja je bila organizovana i koja je djelovala kao politička partija. Sastajali smo se sa predstavnicima političkih partija i dali im konkretne prijedloge, u skladu sa Zakonom o mladima FBiH, koje su neki uvrstili u svoje političke programe. Kreirali smo i bazu [www.integritet.ba](http://www.integritet.ba) – istakla je Mirela Ajanović iz Instituta za razvoj mladih KULT.

Ona je dodala da su svi ovi alati i inicijative pomogle mladima u Bosni i Hercegovini da odluče za koga će glasati. „Prije nego što smo počeli raditi na ovoj inicijativi, istražili smo koji su to problemi mladih pri uključivanju u izborni proces, tj. pri glasanju. Podaci CIK-a pokazali su da zavidan broj mladih glasa, a mi smo zaključili da mladima treba pokazati na koji način da kritički analiziraju i odluče kome žele dati svoj glas. To smo i uradili i jako smo sretni zbog toga“ – tvrdi Ajanović.

O konkretnim načinima političke edukacije mladih ljudi, govorili su i predstavnici koalicije „Pod lupom“, Transparency International BiH, te partnerske organizacije iz Srbije, Makedonije i Kirgistana. Poseban naglasak bio je na političkoj odgovornosti pojedinaca, na učešću mladih u procesu donošenja odluka, političku edukaciju, važnost kritičkog razmišljanja i neformalno obrazovanje.

Konferencija „Uloga organizacija civilnog društva u izborima 2014./2016.“ organizovana je u sklopu projekta „Mladi odlučuju o demokratiji“.

► **FEDERALNO VIJEĆE MLADIH BIT ĆE USPOSTAVLJENO DO KRAJA OVE GODINE**

Predstavnic/e šest kantonalnih vijeća mladih dogovorili su osnivanje krovnog tijela za mlade u Federaciji BiH, a sastanak je održan uz podršku Instituta za razvoj mladih KULT. Predstavnic/e vijeća mladih su, među ostalim, definirali statut budućeg Federalnog vijeća mladih, a razgovaralo se i o budućim članovima Upravnog odbora, Nadzornog odbora i o rukovodstvu.

Federalno vijeće mladih trebalo bi biti uspostavljeno najkasnije do kraja ove godine. Mate Lončar, predsjednik Vijeća mladih Županije zapadnohercegovačke, kaže da bi osnivačka skupština trebala biti održana sredinom decembra u Sarajevu. „Ja sam više nego zadovoljan. Vijeće mladih Županije zapadnohercegovačke spremno je za osnivanje Federalnog vijeća mladih. Razgovarali smo o kandidatima za rukovodstvo Vijeća i pomaci su definitivno napravljeni“ – istakao je Mate Lončar. Formiranje Federalnog vijeća mladih omogućeno je Zakonom o mladima FBiH, dodaje Lončar.

Sastanku kantonalnih vijeća mladih prisustvovao je i Adis Salkić, pomoćnik Federalne ministricke kulture i sporta, koji je izrazio zadovoljstvo jer je osnivanje krovnog tijela za mlade u Federaciji sve izvjesnije. Obećao je podršku koja je mladima itekako važna. „Nadam se da će saradnja između Federalnog vijeća mladih i Federalnog ministarstva kulture i sporta biti jako dobra i da će poslužiti kao primjer, mladima ali i cijelom bh. društvu. Nadam se da će se formiranjem vijeća mladih konačno početi efikasnije primjenjivati Zakon o mladima“ – kaže Mirela Geko, predstavica Vijeća mladih Kantona Sarajevo. Sličnog je mišljenja i Mirel Bijedić, predstavnik Vijeća mladih Tuzlanskog kantona. „Nadam se da će se napokon uspostaviti mehanizmi za rješavanje problema mladih u Federaciji“ – zaključio je Bijedić. Predstavnic/e kantonalnih vijeća mladih razgovarali su i o vizuelnom identitetu Vijeća mladih Federacije.

► **NARANDŽASTI DAN – BH DRUŠTVO MORA STATI IZA ŽENA I DJEVOJČICA KOJE SU ŽRTVE NASILJA**

Svaki 25. u mjesecu obilježava se kao Narandžasti dan – dan borbe protiv nasilja nad ženama i djevojčicama. Institut za razvoj mladih KULT, uz podršku Ambasade SAD-a u BiH, postaviti će izložbu akademske slikarice Emine Kujundžić u Importanne centar u Sarajevu, koja ima za cilj da podigne svijest bh. građana o ovom problemu o kojem se rijetko govori.

Svaka peta žena u Bosni i Hercegovini tokom svog života, proživjela je neki oblik nasilja. Majke, sestre, supruge i kćerke, nerijetko, svakodnevno trpe nasilje o kojem, najčešće uopće ne govore. To je poražavajuća činjenica s kojom se u koštac treba uhvatiti cjelokupno bh. društvo. 51,1% ukupnog bosanskohercegovačkog društva čine žene. Ipak, rodna ravnopravnost izostaje. Upravo to – rodna nejednakost korijen je nasilja kojeg je u Bosni i Hercegovini mnogo. Prema podacima Agencije za ravnopravnost polova, 52,8% žena je od svoje petnaeste godine pretrpjelo neki oblik nasilja. Mada određeni statistički podaci postoje, o pravim brojkama teško je govoriti. Mnogo je veći broj slučajeva koji ostaju neprijavljeni, tvrdi Mirela Ajanović iz Instituta za razvoj mladih KULT.



„Živimo u društvu u kojem je sramota reći da si žrtva nasilja. Živimo u društvu u kojem žene osjećaju da su primorane šutjeti i što je još gore trpjeti nasilje. Porodica je, nažalost, mjesto gdje su mnoge žene i djevojčice žrtve. Zato na Narandžasti dan želimo ukazati na ovaj problem. Ženama poručiti da ne moraju biti same, a društvu da mora stajati iza žrtava nasilja“ – istakla je Mirela Ajanović iz Instituta za razvoj mladih KULT.

U Bosni i Hercegovini postoji nekoliko zakona, na državnom nivou i na nivou entiteta, koji uređuju ovu oblast. Uspostavljeno je i devet sigurnih kuća i SOS telefonske linije koje su besplatne i povjerljive. „Želimo ohrabriti žene da potraže pomoć. Posebnu snagu našoj inicijativi daje činjenica da se istoga dana i na isti simboličan način, kampanja protiv nasilja provodi u cijelome svijetu, zahvaljujući Global UNiTE omladinskoj mreži, čija je Institut članica. Institut za razvoj mladih KULT o problemu nasilja nad ženama i djevojčicama govorit će svakoga dana. Narednih mjeseci na Narandžasti dan radit ćemo kampanje slične ovoj jer nijedna žena ne smije biti žrtva nasilja“ – zaključila je Mirela Ajanović.

Generalni sekretar UN-a proglasio je svaki 25. u mjesecu "Narandžastim danom" (Orange Day), kao dan podsjećanja na važnost prevencije, sprečavanja i sankcionisanja nasilja nad ženama i djevojčicama.

#### ► MEĐUNARODNI DAN DJEČJIH PRAVA

Povodom obilježavanja Međunarodnog dana dječjih prava, u prostorijama Obrazovno-razvodnog centra za mlade SPAJALICA, održana je radionica na temu Dječija prava i odgovornosti.



Polaznici Škole prijateljstva ugostili su svoje vršnjake iz Disciplinskog centra za maloljetnike. Djeca su se kroz edukativnu radionicu upoznala sa svojim osnovnim pravima - pravom preživljavanja, razvojnim pravima, pravima sudjelovanja, te sa pravom zaštite. Također, djeca su se susrela i sa činjenicom da se za svako pravo vežu i neke odgovornosti koje oni moraju poštovati. Nakon radionice, upriličeno je druženje kroz igru, ples i zabavu. Ovaj, za njih važan dan, protekao je sa osmijesima na njihovim licima i polaznici Škole prijateljstva nisi krili oduševljenje što su upoznali nove prijatelje. Cilj radionice bio je podstaći djecu da prepoznaju važnost zaštite svojih prava te da prepoznaju svoje polje odgovornosti u zaštiti istih.

Međunarodni dan dječjih prava u cijelom se svijetu obilježava od 1989. godine.

**OMLADINSKA ORGANIZACIJA "SVITAC"**

Jusufa Čampare bb, 76 100 Brčko Distrikt

Tel./Fax: 049 211 032

Email: [svitarac@teol.net](mailto:svitarac@teol.net)Web: [www.svitarac.org](http://www.svitarac.org)Facebook: [www.facebook.com/omladinska.svitarac](http://www.facebook.com/omladinska.svitarac)**► KREATIVNE RADIONICE**

Omladinska organizacija Svitarac je u novembru nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Grupa sa mališanima od 4-7 godina je pravila lampione od šarenog papira i razne figure od plastelina. Takođe su svakog ponedjeljka učili osnove engleskog jezika, koristeći bojaniku za učenje boja i nazive povrća, brojeve i razne vrste životinja. Učenje je olakšano kroz pjevanje i muziku. Cilj radionica je bio da mališani razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U oktobru je 25 učesnika pohađalo jutarnje kreativne radionice.



Za poslijepodnevnu grupu usvojen je novi raspored aktivnosti (uzrast 8+). Ponedjeljkom je na rasporedu engleski jezik, alfabet, izgovor, kao i fleš kartice za ponavljanje vokabulara. Utorkom kreativno izražavanje, kreiranje dekoracija koristeći akrilne boje, flomastere, drevne bojice i kolaž papire. Srijedom je muzička radionica, na kojoj učesnici imaju priliku da uče osnove sviranja na trubi, gitari ili klaviru i razvijaju sposobnosti komunikacije i dijaloga na temu ritam, note i razni pravci muzike. Četvrtkom je sportski dan, gdje se organizuju razne vrste igara sa loptom, upoznavnja sa osnovama karatea i drama. Grupa je podijeljena u dvije manje i učesnici imaju mogućnost da izaberu sport ili dramu. Petak je dan za učenje njemačkog jezika kao i za pomaganje u radu domaće zadaće.

Radionice se održavaju u Omladinskom centru Brčko distrikta. Koordinator radionica u novembru je bila Asja Subašić, uz asistenciju Weltwaerts i EVS međunarodnih volontera Jonasa Kiesnera, Anne Bonitz i Johanne Weng iz Njemačke, zatim Isambarda Rynera, Sarah Dyle-Kitchin i Georgie Allen iz Velike Britanije. Broj učesnika je trenutno 20.

**► JEZIČKE RADIONICE**

Kursevi engleskog i njemačkog jezika su nastavljani i u novembru. Ove kurseve trenutno pohađa 35 studenata, a podijeljeni su u tri grupe (Početni 1, Početni 2 za djecu i odrasle i Srednji 1 za djecu). Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitarac i Omladinskom centru Brčko distrikta. Starost studenata je od 8 do 35 godina.

**► RADIONICE GITARE**

Učesnici radionica gitare nastavili su sa radom i u novembru. Početkom mjeseca učesnici su utvrđivali prethodno usvojeno znanje a u drugoj polovini mjeseca uvježbavali su nove tehnike, etide i kraće kompozicije u skladu sa njihovim mogućnostima.

### ► RADIONICE SAMBE

Učesnici su uživali u sviranju uvježbanih kompozicija, improvizaciji kao i učenju notnih vrijednosti i čitanju kraćih notnih zapisa.

### ► ALTERNATIVNI HOR

U novembru su učesnici alternativnog hora uvježbavali pjesmu "Jacks Lament" iz animiranog filma „Nightmare before christmas“ koja bi trebala biti izvedena na novogodišnjoj zabavi koja je planirana za decembar.

### ► HALLOWEEN PARTY – ZABAVA NOĆ VJEŠTICA

Omladinska organizacija je i ove godine organizovala Halloween Party za djecu sa područja Brčko distrikta. Zabava je održana u dva dijela 30.10. 2015. godine u prostorijama Omladinskog centra Brčko distrikta. Prvi dio je bio namijenjen mališanima od 4-6 godina, koji inače pohađaju dnevne aktivnosti Omladinske organizacije Svitac. Gledali su crtane filmove na temu Halloween, a zatim su imali malu zakusku i vrijeme za ples. Za djecu uzrasta 8+ su u večernjem terminu bile osmišljene razne igre kroz 4 stanice koje su pripremili lokalni i međunarodni volonteri iz Velike Britanije i Njemačke. Djeca su imala priliku da se slikaju u „ukletoj kući“, zatim da probaju neobičnu hranu, pokušaju uhvatiti jabuke u posudi punoj vode ne koristeći ruke i da pokucaju na vrata strašnog zamka. U drugom dijelu zabave je pripremljen i kraći program uz kratku horor predstavu i izbor za najbolji kostim uz nagradu. Zakuska je ostavljena za kraj zabave gdje su djeca probala „vještičije prste“, zeleni puding, duhove puslice, „zaleđenu ruku“, „kolač od zemlje“ i druge zanimljive poslastice koje su za njih pripremili lokalni i međunarodni volonteri.



Djeca su imala priliku da se slikaju u „ukletoj kući“, zatim da probaju neobičnu hranu, pokušaju uhvatiti jabuke u posudi punoj vode ne koristeći ruke i da pokucaju na vrata strašnog zamka. U drugom dijelu zabave je pripremljen i kraći program uz kratku horor predstavu i izbor za najbolji kostim uz nagradu. Zakuska je ostavljena za kraj zabave gdje su djeca probala „vještičije prste“, zeleni puding, duhove puslice, „zaleđenu ruku“, „kolač od zemlje“ i druge zanimljive poslastice koje su za njih pripremili lokalni i međunarodni volonteri.

### ► 9. NOVEMBAR – DAN PROTIV FAŠIZMA I ANTISEMITIZMA

Od 2. do 6. novembra Omladinska organizacija Svitac je organizovala sedmodnevni niz radionica za djecu u dobi od 8-12 godina. Radionice su se bavile pitanjima fašizma i antisemitizma, edukacijom grupe na temu istorije, važnosti zajednice, timskog rada, ljubavi i poštovanja, kao i metodama suprotstavljanja fašizmu. Organizovane su posebne radionice na ovu temu za mlađi uzrast (4-7) kao i predstava za odrasle, nakon čega je slijedila grupna diskusija. Na kraju sedmice je postavljena izložba u Omladinskom centru na temu "This Love Fights Fascism." (Ova ljubav se bori protiv fašizma).



Za decembar se planira nastavak svih redovnih radionica Omladinske organizacije Svitac.

**Omladinski klub »DIJAMANT«**

Bučići 42, 70 101 Jajce

Tel./fax: 030-279-444, 061-179-209,

063-366-811

E-mail: [m.sekib@bih.net.ba](mailto:m.sekib@bih.net.ba)WEB: [www.ocd-dijamant.net](http://www.ocd-dijamant.net)

Omladinski klub »DIJAMANT« JAJCE

**► MLADI JAJCA OSTAVILI SVOJ TRAG / PORUKU ZA VREMENSKU KAPSULU 2035. GODINE**

U sklopu dvomjesečne kampanje koju USAID, u saradnji sa Omladinskim klubom "Dijamant" Jajce realizira povodom obilježavanja dvadesete godišnjice Dejtonskog mirovnog sporazuma u BiH, kreirana je Vremenska kapsula 2035. godine. U kapsuli su prikupljena mišljenja i zapažanja mladih Jajca o problemima sa kojima se susreću, a za koje smatraju da se trebaju riješiti u narednom periodu. Ovom prilikom mladi Jajca su imali priliku skrenuti pažnju na neke od problema sa kojima se susreću u svakodnevnom životu, a tiču se svih nas.



Vrijeme koje je iza nas najbolje pokazuje šta smo radili u proteklim godinama, a ono koje dolazi svjedočiti će koliko smo bili spremni djelovati i izgraditi bolju budućnost. Vremenska kapsula pohranjuje sva zapažanja i mišljenja o potrebnim promjenama u BiH i djeluje kao opomena da vrijeme leti.

## NOVI ČLANOVI



### FONDACIJA HUMANOST U AKCIJI BIH

Skenderija 33, 71 000 Sarajevo

Tel.: 033 218 281

Fax: 033 557 996

E-mail: [j.hasic@humanityinaction.org](mailto:j.hasic@humanityinaction.org)

Web: [www.humanityinaction.org](http://www.humanityinaction.org)

#### ► UKRATKO O ORGANIZACIJI:

Humanity in Action BiH je obrazovna organizacija koja teži ka izgradnji globalne mreže studenata i mladih profesionalaca predanih promociji ljudskih prava, raznolikosti i aktivnog građanstva. Poseban akcenat naših aktivnosti je na promociji pomirenja i izgradnji društvenog povjerenja među duboko podijeljenim etničkim i religijskim grupama u Bosni i Hercegovini.

Još od 2005. godine, Humanity in Action je kroz ljetne obrazovne programe izgradila aktivnu mrežu od preko 80 mladih ljudi u Bosni i Hercegovini koji su posvećeni jačanju njihove uloge u civilnom društvu i lokalnim zajednicama.

Fondacija Humanity in Action BiH je osnovana 2005. godine, i od tada do danas je bila dio nekoliko projekata, kao što je organizacija Seminara na temu Bosnia and Herzegovina: Challenges of a Post-Conflict Society”, 2010. godine. (Bosna i Hercegovina: Izazovi postkonfliktnog društva); kao i implementacija akcionog projekta Jasmina Hasića, polaznika našeg ljetnog programa, pod nazivom „Books4Vijećnica“ u sklopu kojeg su prikupljene knjige za Vijećnicu ali i donirane Univerzitetima u Zenici i SSST-u.

2012. godine Humanity in Action je bila organizator i domaćin Međunarodne konferencije Humanity in Action.

Također, Humanity in Action BiH je implementirala i sljedeće projekte:

- „Poticanje demokratskih vrijednosti i aktivnog građanstva među mladima“ je projekat finansiran od strane National Endowment for Democracy koji se implementira već četvrtu godinu zaredom, a ima za cilj prenošenje znanja o demokratiji, ljudskim pravima i građanskom aktivizmu, te poticanje aktivnosti mladih unutar njihovih lokalnih zajednica. (Više informacija dostupno na <https://www.facebook.com/PDVIAGMM>)
- Model International Criminal Court for Western Balkans (MICCWeB) na kojem je Humanity in Action bila partnerska organizacija od 2012. do 2015. godine. Projekat je obuhvatao srednjoškolce i studente pravnih fakulteta sa prostora Zapadnog Balkana, imao je za zadatak da prikaže simulaciju suđenja pred Međunarodnim krivičnim sudom. - Historija, Istorija, Povijest – Lessons for Today na kojem je Humanity in Action BiH kao partner učestvovala u biranju eksperata angažovanih na izradi panela koji će biti dio izložbe Anne Frank koja će govoriti o lokalnoj historiji - kako Jugoslavije - tako i novijoj historiji nezavisne države Bosne i Hercegovine.
- HiA BiH je partner forumu ZfD (Ziviler Friedensdienst) iz BiH na dva projekta: Memory in Motion (sjećanje u pokretu), trening za profesore i osobe koje rade sa mladima o upotrebi pedagoškog materijala o historiji bivše Jugoslavije i analizi spomenika iz tog perioda, te organizacija omladinskog događaja (Youth Event) u Tuzli u avgustu 2015. godine a koji je okupio preko 250 mladih ljudi.

## SAOPŠTENJA / INFORMACIJE / DONATORI /POZIVI

### 1. POZIV jedinicama lokalne samouprave i mjesnim zajednicama za izražavanje interesa za učešće u projektu “Jačanje uloge mjesnih zajednica u Bosni i Hercegovini”

Projekat “Jačanje uloge mjesnih zajednica u Bosni i Hercegovini (MZs)” (2015-2019) predstavlja zajedničku inicijativu i finansiran je od strane Švedske i Švicarske, a provodi ga Razvojni program Ujedinjenih nacija (UNDP) u partnerstvu sa Ministarstvom za ljudska prava i izbjeglice Bosne i Hercegovine, Ministarstvom pravde Federacije Bosne i Hercegovine, Ministarstvom uprave i lokalne samouprave Republike Srpske, Vladom Brčko Distrikta i oba entitetska saveza opština/općina i gradova.

Ovim putem objavljujemo poziv za podnošenje prijave zainteresovanim jedinicama lokalne samouprave i pripadajućim mjesnim zajednicama da uzmu učešće u implementaciji projekta “Jačanje uloge mjesnih zajednica u Bosni i Hercegovini (MZs)”.

Cilj ovog javnog poziva jeste odabir **10 jedinica lokalne samouprave (JLS)** i **60 mjesnih zajednica (MZ)** sa njihovog područja koje će uzeti učešće u projektu i primiti podršku u područjima većeg demokratskog učešća građana, poboljšanja lokalne infrastrukture i revitalizacije lokalnih zajednica kao demokratskog prostora za građanske inicijative.

#### Ko može aplicirati?

U skladu sa striktno definisanim kriterijima unutar odobrenog projektnog prijedloga **pozivamo sljedeće jedinice lokalne samouprave i njihove pripadajuće mjesne zajednice** da se prijave u okviru ovog poziva za izražavanje interesa.

Banja Luka, Banovići, Bihać, Bijeljina, Bosanska Krupa, Bosanski Petrovac, Bratunac, Brčko, Brod, Bugojno, Bužim, Centar Sarajevo, Cazin, Derventa, Doboj, Doboj Istok, Doboj Jug, Drvar, Foča, Foča-Ustikolina, Fojnica, Gračanica, Gradačac, Gradiška, Ilijaš, Istočno Novo Sarajevo, Jablanica, Jajce, Kalesija, Kalinovik, Kladanj, Ključ, Kostajnica, Kotor Varoš, Kozarska Dubica, Laktaši, Livno, Lopare, Ljubinje, Ljubuški, Lukavac, Maglaj, Mostar, Modriča, Mrkonjić Grad, Nevesinje, Novi Grad, Novo Sarajevo, Stari Grad Sarajevo, Odžak, Olovo, Orašje, Osmaci, Pale, Pale – Prača, Petrovo, Posušje, Prijedor, Prnjavor, Prozor-Rama, Ribnik, Rudo, Sanski Most, Srbac, Šamac, Šipovo, Široki Brijeg, Srebrenik, Teslić, Tešanj, Tomislavgrad, Trnovo RS, Trnovo FBiH, Tuzla, Trebinje, Usora, Velika Kladuša, Vlasenica, Višegrad, Vukosavlje, Zenica, Zvornik, Žepče, Živinice.

#### Informacije i dokumentaciju aplikacije za poziv za izražavanje interesa možete pronaći na sljedećim internetskim stranicama:

Elektronska verzija kompletnog paketa dokumenata za prijavu nalazi se na sljedećim internetskim adresama: <http://www.ba.undp.org> [www.sogfbih.ba](http://www.sogfbih.ba)

#### Gdje se podnose aplikacije za prijavu?

Kompletan paket dokumenata treba dostaviti u koverti na kojoj će biti napisano: „Poziv za dostavljanje prijave od jedinica lokalne samouprave i mjesnih zajednica kojima izražavaju interes za učešće u projektu „Jačanje uloge mjesnih zajednica u Bosni i Hercegovini“, na sljedeću adresu:

**Razvojni program Ujedinjenih nacija  
UN House, “Zmaja od Bosne” b.b., 71000 Sarajevo  
Bosna i Hercegovina**

#### Rok za podnošenje prijave

Rok za podnošenje prijave je **11. decembar/prosinac 2015. godine.**

Više informacija na:

[http://procurement-notices.undp.org/view\\_notice.cfm?notice\\_id=26938](http://procurement-notices.undp.org/view_notice.cfm?notice_id=26938)

## **2. RASPISAN JAVNI POZIV za dostavljanje programa sportskih manifestacija od posebnog značaja i značaja za Republiku Srpsku za 2016. godinu**

Ministarstvo porodice, omladine i sporta raspisalo je 18. novembra 2015. godine javni poziv za dostavljanje programa sportskih manifestacija od posebnog značaja i značaja za Republiku Srpsku za 2016. godinu, kojim poziva sportske saveze, sportske organizacije i sportska stručna udruženja u Republici Srpskoj da dostave svoje programe sportskih manifestacija radi izrade Programa razvoja sporta Republike Srpske sa prioriternim oblastima finansiranja za 2016. godinu.

Javni poziv u kojem su propisani uslovi prijavljivanja i potrebna dokumentacija, objavljen je na sajtu Ministarstva porodice, omladine i sporta. Programi sportskih manifestacija treba da budu dostavljeni do 18. decembra 2015. godine, na Prijavi za dostavljanje programa sportskih manifestacija od posebnog značaja i značaja za Republiku Srpsku

(prijava se može preuzeti na web adresi: [www.vladars.net](http://www.vladars.net) →Ministarstvo porodice, omladine i sporta→Dokumenti),

Prijavu slati na adresu:

**Ministarstvo porodice, omladine i sporta**  
**Trg Republike Srpske br. 1**  
**78 000 Banja Luka**

sa naznakom: "Javni poziv za dostavljanje programa sportskih manifestacija od posebnog značaja i značaja za Republiku Srpsku za 2016. godinu."

Sportske manifestacije od posebnog značaja i značaja za Republiku Srpsku, koje budu uvrštene u Program razvoja sporta Republike Srpske sa prioriternim oblastima finansiranja za 2016. godinu, Ministarstvo porodice, omladine i sporta će sufinansirati, u skladu sa usvojenim Budžetom za 2016. godinu i u skladu sa članom 4. Pravilnika o uslovima i kriterijumima za finansiranje nosilaca razvoja sporta Republike Srpske ("Službeni glasnik Republike Srpske" br. 17/10).

Izvor:

<http://www.vladars.net/sr-SP-Cyrl/Vlada/Ministarstva/mpos/media/vijesti/Pages/Javni-poziv-sportske-manifestacije.aspx>

## **3. UNDEF poziv za projekte**

UN Demokratski Fond poziva organizacije civilnog društva da apliciraju za finansiranje projekata u oblasti razvoja i podrške demokratiji. Ovaj poziv je otvoren od 15.11. do 31.12.2015. Poziv se može naći na stranici [www.un.org/democracyfund](http://www.un.org/democracyfund). Aplicirati se može samo online tokom pomenutog perioda, aplikacije bi trebale biti na Engleskom ili Francuskom jeziku.

UNDEF projekti traju dvije godine. Aplikanti mogu zatražiti iznose od 100,000 US dolara do maksimalno 300,000 US dolara. UNDEF podržava projekte koji jačaju glas organizacije civilnog društva, promovišu ljudska prava, i podstiču učešće svih grupacija u demokratskim procesima. Većina UNDEF finansija ide za podršku organizacijama civilnog društva koje dolaze iz zemalja koje su u tranziciji.

Svi projektni prijedlozi prolaze rigorozan selekcion proces, manje od dva posto prijedloga se odabere za finansiranje. Projekti trebaju da se bave jednom od sedam glavnih tema:

Aktivizam u zajednici

Vladavina prava i ljudska prava

Alati za unapređenje znanja  
Jačanje žena  
Omladinski angažman  
Mediji i sloboda informacija  
Jačanje suradnje sa vladom

Jednom kada se kratka lista odobri od strane Generalnog sekretara, prijedlog ide u finalnu fazu selekcionog procesa: pripreme projektne dokumentacije, što između ostalog predstavlja ugovor između UNDEFa i organizacije koja je dobila grant. Pripremna dokumentacija podrazumjeva još i precizniji projektni prijedlog, i uključuje detaljne sugestije i inpute od strane UNDEFa i aplikanta. Tek nakon završetka projektne dokumentacije i odobrenja iste od strane UN kontrolora, projekat će se formalno odobriti i sredstva će se dodijeliti. Ovo se može očekivati najranije u Septembru.

Više informacija na: <http://www.un.org/democracyfund/apply-funding>

#### 4. Konkurs za grantove u oblasti zelene hemije

**Oglas otvoren do: 28.02.2016**

U okviru partnerstva između UNESCO, ruske kompanije PhosAgro i Međunarodne unije za čistu i primijenjenu hemiju (IUPAC) raspisan je konkurs za istraživačke grantove do 30.000 dolara za mlade istraživače sa inovativnim prijedlozima projekata u oblasti zelene hemije. Za grant sredstva se mogu prijaviti mladi istraživači do 35 godina starosti koji vode istraživačke projekte koji se mogu sprovesti u roku od godinu dana. Konkurs je otvoren do 28. februara 2016. godine.

Više informacija potražite [ovdje](#).

Izvor: [berzarada.ba](http://berzarada.ba)

#### 5. Prva evropska konferencija o odgovornom istraživanju

Konferencija posvećena odgovornom istraživanju i inovacijama održaće se u Barseloni 18. marta 2016. godine u okviru projekta HEIRRI. Svi koji bi želeli da učestvuju na konferenciji i koji se bave temom odgovornog istraživanja i inovacija mogu da pošalju svoj apstrakt do 15. decembra 2015. godine ukoliko ispunjavaju zadate kriterijume poziva.

HEIRRI je evropski projekat koji se finansira iz programa Horizont 2020 sa ciljem da integriše koncept RRI (Responsible Research and Innovation) u oblast nauke.

Konferencija koja se održava sredinom marta u Barseloni okupiće stotinjak profesionalaca iz sfere visokog, formalnog i neformalnog obrazovanja, iz instituta i istraživačkih centara, industrije, javnog sektora i organizacija civilnog društva, a koji se bave istraživanjem i razvojem.

Program konferencije sastojće se od predavanja, radionica i sesija, koje za cilj imaju da omoguće učesnicima razmjenu iskustva i dobre prakse u pogledu načina na koji visokoškolske institucije mogu da uključe širu zajednicu u usvajanje koncepta RRI-ja.

Tim povodom, organizatori HEIRRI konferencije su raspisali javni poziv za učešće na konferenciji sa željom da na njoj budu predstavljene dobre prakse i materijali za održavanje treninga o različitim elementima kojima se RRI bavi kao što su: rodna ravnopravnost, integritet pri istraživanju, otvoreni pristupi, diverzitet, inkluzija, održivost, transparentnost i dr. Na ovoj konferenciji će se takođe predstaviti i mogući načini za integrisanje ovih elemenata u kurikulume, čime bi oni postali dio obrazovnih ishoda u sistemu visokog obrazovanja.

Dodatne informacije: [www.rri-tools.eu](http://www.rri-tools.eu)

## 6. Otvoren konkurs za projekte iz oblasti kulture

Ministarstvo prosvjete i kulture Republike Srpske raspisalo je Javni konkurs za sufinansiranje projekata iz oblasti kulture za raspodjelu dijela prihoda od igara na sreću.

Putem ovog konkursa biće sufinansirani projekti iz oblasti međunarodne saradnje - podrška organizacijama, udruženjima i ustanovama kulture koje koriste sredstva inostranih fondova te oblasti decentralizacije u kulturi. Posebni uslovi za svaku od navedenih oblasti utvrđeni su samim Javnim konkursom.

Pravo podnošenja prijave na Javni konkurs, koji je otvoren do 25. decembra ove godine, imaju organizacije, udruženja građana i ustanove za obavljanje kulturne djelatnosti registrovane na teritoriji Republike Srpske, dok ustanove kulture čiji je osnivač Republika Srpska ne mogu učestvovati u raspodjeli sredstava.

Ocjenjivanje i vrednovanje prijavljenih projekata vršiće se na osnovu posebnih kriterijuma utvrđenih za svaku od oblasti kulture na koje se konkurs odnosi.

Prijavu na Javni konkurs sa kompletnom dokumentacijom potrebno je dostaviti lično ili putem pošte na adresu Ministarstva prosvjete i kulture Republike Srpske, Trg Republike Srpske 1, 78000 Baња Лука, sa naznakom „Konkurs za sufinansiranje projekata iz oblasti KULTURE za raspodjelu dijela prihoda od igara na sreću za 2015. godinu“.

Javni konkurs za sufinansiranje projekata iz oblasti kulture za raspodjelu dijela prihoda od igara na sreću za 2015. godinu, kao i prateći obrazac prijave, te finansijski obrazac koji je potrebno priložiti kao sastavni dio projekta, dostupni su na portalu Vlade Republike Srpske ([www.vladars.net](http://www.vladars.net)), na stranici Ministarstva prosvjete i kulture. Nepotpune i neblagovremene prijave neće se uzeti u razmatranje.

## 7. La Blaiserie – EVS u Francuskoj

Rok prijave 25.12.2015

Socio-kulturni centar La Blaiserie, organizuje internacionalnu mobilnost među mladim ljudima koji učestvuju u izgradnji evropskih projekata za sve sektore i oživljavaju evropske projekte za centar Blaiserie.

**Razni vidovi volontiranja su:**

- Organizovanje i učestvovanje u internacionalnim razmjenama mladih
- Organizovanje debata u grupama na engleskom
- Traženje evropskih fondova

Tokom EVS-a (evropske volonterske službe), volonter može otkriti strukturu posmatranjem i poznavanjem različitih sektora (sportske aktivnosti, pomoć pri obavljanju domaćih zadataka itd). Volonter će sa stalnim osobljem, sačinjenim od mladih ljudi, razvijati projekte (grupne debate, sportske aktivnosti, posvećenost omladinskoj mreži). Volonter može predložiti nove ideje vezane za aktivnosti koje može sprovesti sam ili u timu u zavisnosti od njegovih/njenih vještina.

Volonter ima svoj smještaj ili dijeli kuću sa ostalim EVS volonterima. Mjesečno prima novac za hranu i džeparac. Dobija autobusku kartu za sve linije u gradu.

Volonter mora biti neko ko je otvoren i radoznao, motivisan i zainteresovan za projekte, naročito kreativan i spreman za nove ideje. Zahtijeva se srednji nivo znanja francuskog jezika. Njegova/njena pozicija je važna u smislu prakse razmjene i jezičkih vještina. Volonter će raditi u timu i biti podrška individualnim ili grupnim projektima.

*Ako ste zainteresovani za ovaj projekat pošaljite Vaš CV i prpratno pismo na [annalisa.lettieri@ij-poitou-charentes.org](mailto:annalisa.lettieri@ij-poitou-charentes.org). Volonter će biti izabran prema motivaciji i interesu koji izrazi za projekat i aktivnosti.*

Dragi prijatelji,  
Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

**Rok za dostavljanje informacija za svako naredno izdanje je 30.-ti u mjesecu.**

WEB Stranica Mreže:

sCh design

Webmaster:

Emir Delalić-Zeko -  
Tuzla

emir.delalic@gmail.com

web: [www.omladina-bih.net](http://www.omladina-bih.net)

mejling lista Mreže:

[posta@omladina-bih.net](mailto:posta@omladina-bih.net)

Adrese za slanje vaših informacija za mjesečni bilten:

[hcatuzla@bih.net.ba](mailto:hcatuzla@bih.net.ba); [orctuzla@bih.net.ba](mailto:orctuzla@bih.net.ba)

fax: 035 258 077

Omladinski resursni centar Tuzla

Hadži Bakirbega Tuzlića 1,  
75000 Tuzla

tel / fax: 035 258 077

e-mail: [orctuzla@bih.net.ba](mailto:orctuzla@bih.net.ba)

[hcatuzla@bih.net.ba](mailto:hcatuzla@bih.net.ba)

**Mjesečni bilten uređuje Omladinski resursni centar - ORC Tuzla**